



Rabu, 03 Pebruari 2021

Ogen: Heber 12: 7- 11



Jabu Ingan Pendidiken



Ibas masa pandemic covid 19 enda enggo tambah keleng ate bage pe perhatin moria nandangi anak-anak bas tengah jabu. Sebab anak-anak pe erlajar i rumah nari secara daring (dalam jaringan) arah jaringan online si berhubungan ras teknologi ras internet. La banci lang pasti moria ikut ndampingi anak, ngorati anak kerna tugas-tugas sekolahna. Pengajaren nandangi anak-anak i tengah jabu eme tanggungjawab orangtua! Janah ngajari anak-anak pe perintah i bas Dibata nari man banta selaku orangtua (bd. Ulangen 6: 7). Siarak-arak ia, siarahken ia, sibegiken pendapatna, enda kerina tandana kita selaku orangtua mendukung anak-anakta i bas pedidikan ras perkembangenna. I bas si la pasna siakap pendalankenna sirawai anakta, alu tujun erlajar ia i bas kesalahen nari guna erban siterulin ku bas wari-wari si reh enda. Sebab adi sipediat anakta, la siperdiateken, la siorati, la sirawai tupung tangkas teridah kesalahenna, enda alarm penginget kurang ateta kelengna nandangi ia. Situhuna orangtua me usihen si pemena iidah anak-anak bas tengah jabu e. Pendidikan bas tengah jabu tentu labo melulu kerna pendidikan akademis, tapi prilaku, moral, pemilihan kata-kata guna ibelasken.

Bagi oratenta sendah antara Dibata ras kita eme hubungan orang tua (bapa) ras anak. Ban keleng ateNa ersura Ia gelah kita nggeluh benar. IajarkenNa kita guna kiniulinta nggeluh. Kita terdidik, dingen kita nggeluh bagi singena ate Dibata. I bas pendidikan Dibata e tentu lit tujunNa eme gelah kita nggeluh rikutken si ngena atena janah dat bagin i bas kebadianNa. Selaku anak iwarisken Dibata ateNa man banta kegeluhen si rasa lalap. Adi kataken warisen, e pemere si la man galaren, la man ulihenken. saja adi enggo sialoken warisen e tetap perlu ijaga, ipekena-kena, ipake guna ngkuhi kegeluhen. Guna si eme maka kita ididikNa gelah beluh ngergaken pemerena si tuhu-tuhu e. Di kune lita la anakna, tentu labo bage kal pendidikanNa banta. Aristoteles pernah ngatakenca: pendidikan mempunyai akar yang pahit, tapi buahnya manis. Ertina gia waktu iajarken e ceda ateta, tapi ngatakan bujurlah kita pemeteh e enggo seh bas kita guna sipakeken bas geluhta.